





IN FVNERE  
**FABRICII GENTINII.**  
E' CONGREGATIONE  
BEATISSIMÆ VIRGINIS DEI  
Matris Annunciatæ,

ET  
*ACADEMICI PARTHENII,*  
*In Ferrariensi Gymnasio Societatis IESV.*

ORATIO  
HABITA IN ACADEMIA PARTHENIA  
ab ALPHONSO GILIOLO Comite, & eiusdem  
Academiæ Principe.




*FERRARIAE,*

*Apud Benedictum Mammarellum. 1591.*

*Superioribus approbantibus.*

*ALPHONSVS GVALENGVS,  
Academicis suis Parthenijs ornatiss. S.*



*Fabricij Gentinij, Academici nostri demortui laudes, & eximia in nostram Academiam promerita, digna profecto sunt, quæ omnium nostrum, non linguis tantum, sed literis etiam, cæterisque laudis insignibus immortalitati commendentur. Id superioribus mensibus erecto illi monumento, & conditis in eius obitum carminibus, tum publice recitandis; tum vero edendis, videbamur aliquo pacto consecuti. Reliquum illud erat, ut typis eiusdem laudatio funebris, eo ipso tempore per Alphonsum Giliolum Illust. Com. tunc Principem nostrum, cui me succedere voluistis, habita mandaretur. id quo minus fieret, obstabat Pauli Gentinij parentis, & eius quem dixi Principis modestia singularis. Sed vicit omnem difficultatem, vestra erga Fabricium pietas plane mirabilis; & ita vici, ut vobis potentibus, atque adeo flagitantibus cedere necesse fuerit, orationemque vulgare. quam tamen, si virtus est cum necessitate iungenda, speramus, Academico quidem vita functo perhonorificam, vobis autem de vero illius honore laborantibus, ac bene viuendi, moriendique rationem perdiscere cupientibus, non ingratham, non iniucundam futuram.*

*Valete.*

*\*\*  
\**





# ILLVSTRI VIRO ALPHONSINO TROTTO

Patrono suo splendidissimo,

FRANCISCVS GENTINIVS. S. D.



Parentis mei erga te, tuamque illustrem familiam singulare studium, à suis maioribus hereditario quodam iure acceptum, proprio iudicio curaque retentum, atque auctum; tale semper tantumque fuit, ut de illo per se, liberosque suos testificando, consueuerit prope dicam assidue cogitare. Occasionem ad id præstandum sanè præclaram sibi exoptati anno superiore vidit oblatam; sed ut fallaces, & incerti sunt rerum humanarum euentus, ea vix dum exorta prorsus evanuit. Fabricius germanus meus natu maior, mihi que carissimus, ad laborum quos in Ferrariensi Gymnasio Societatis IESV, in linguarum, & eloquentiæ studiis impenderat, fructus non mediocres colligendos parabat sese: ac Theses ex tota Rhetorica facultate desumptas, à se Doctoris sui non permissu tantum, sed hortatu publice sustinendas, tuoque præclarissimo nomine illustrandas, habebat in promptu. Verum enimvero, alia de illo statuerat Deus Opt. Max. Itaque ineunte autumno, eum ad christianarum virtutum, in quibus præcipue laborabat sempiterna præmia, in cælum, quemadmodum quidem confidimus euocavit. Fefellerat ergo me, patremque meum spes nostra; & cum talis fratris, filijque iactura, concupitæ oportunitatis amissio iungebatur. Verum inter tantas aduersarum rerum tenebras, nobis diuinæ voluntati acquiescentibus, ea se inexpectatæ consolationis lux obtulit. Obitum Fabricij, tanto honore, Academici Parthenij Ferrarienses, eius in eloquentiæ curriculo socij, pro eximia sua humanitate prosecuti sunt, quantum nos, tenuitatis nostræ haudquaquam immemores, non

dicam petere, sed ne optare quidem ausi unquam essemus. Atque  
vt Carmina quędam eorum ingenijs digna, ab ijs in obitum fratris  
mei iam pridem vulgata prætereā; Laudationem quoq; illius fune-  
brem, ab Alphonso Giliolo Illustri Comite, & per id tēpus Acade-  
mię Parthenię Principe, in præclaro virorum confessu habitā, pla-  
cuit ijsdem quos dixi Parthenijs, iustas ob causas in lucē proferre.  
Idvbi Paulus pater meus omnino constitutū rescivit; facile ab Aca-  
demicis impetrauit, vt liceret sibi, quando in sententia perstare  
vellent, eam orationem tibi, per me in eadem Societatis IESV di-  
sciplina Humanitati studentem, pro Fabricij nostri Theorematis  
offerre, ac dicare. Quod quidem facio ex animo, T R O T T E  
clarissime: teque etiam, atque etiam rogo, vt hoc nostrę in te obser-  
uantię pignus, licet assumptum extrinsecus, illustre tamen ipsum  
per se, & cum nostra perpetua in te voluntate coniunctum,

benignitate illa tua, quę pari generis claritati respondet,  
ne graueris accipere. id si vti spero consequar;

in virtutum, bonarumque artium cursu ma-

iores faciam quotidie progressus; & ad

animi nostri, tuę glorię studio-

sissimi argumenta, diuino

primum beneficio, tum

vero etiam meo

ingenio, &

labo-

re

parta diuulganda, magis in dies, ac

magis incitabor. Vale. Fer-

rarię. Anno M.D.XCI.

Cal. Febr.

\*\*

\*

# ORATIO



*I* vera pietas, atque virtus, acerbis rerum  
 euentu perturbata, motus animorum, dolo-  
 rem, lachrymas iure suo postulat; merito  
 commoueri, dolere, lachrymari debemus  
 Parthenij humanissimi; cum Fabricium  
 Gentinium, Sodalem, & Academicum nostrum, virtute,  
 ac pietate clarissimum, laudabili, & christiana illa qui-  
 dem, sed inexpectata, luctuosaq; morte nobis ereptum  
 sentiamus. Ac sane, si cuiquam iustus honor habitus  
 est in funere socio nostro; in Fabricio, nihilominus profec-  
 to iustus, quin multo etiam fortasse iustior reperietur. cæ-  
 teri qui in nostra Congregatione, atque Academia mortem  
 obiere (quibus nuper adscripsimus Ioannem Prampoli-  
 num, & Ioannem Andream Serenum iuuenes honestissimos;  
 quorum laudes hodie carminibus attingemus; nam lauda-  
 tiones oratorias in aliud tempus iure censuimus differendas)  
 ceteri igitur, præstantes illi quidem fuere humanis, diui-  
 nisque muneribus: verum nec ita pridem, perfectioris  
 virtutis curriculū erant ingressi; neque admodum sæpe ac diu  
 in re nostra publica gubernanda, & illustranda laborauerant.  
 Fabricius Gentinius, & diutissime quantum in ipso fuit,  
 in inge-



tentiam à Doctore nostro quotidie interrogabantur, expedite in primis, ac erudite responderet; sed iudicatus etiam ab eodem eloquentiæ magistro iam esset, ad Theses ex uniuersa benedicendi Arte depromptas, & excusas, in publico defendēdas aptissimus. Sed incertum uidelicet nostræ uitæ cursum, aliter sæpe, ac nos ipsi maximus ille & omnium Parens, & rector instituit, moderatur, absoluit. nam dum Rhetorica Theoremata, omnem illam doctrinam complectentia, ab eo quemadmodum sperabatur, hoc ferme tempore, hoc ipso in loco sustinenda, ipsi propemodum prelo mandantur; ecce tibi repentina febris, ingeniosum conatum interrumpit: ac paucis post diebus, Deo immortalī rem totam longe melius dirigente, ne finem quem sibi homines proposuerant sortiretur ultimum, se se mors ipsa penitus interposuit. Proh quam varia est humana uitæ, commutabilisque ratio; quam uana, quam leues, quam misera nostra cogitationes: quæ tum persæpe in medio rerum cursu repente corruunt, tum sæpissime nobis ex ipsis carceribus vix egressis, cunctaq; ad voluntatem fluxura confidentibus miserabiliter intereunt. Prætereamus hic, ne infinita reddatur oratio nostra, inueniendi, collocandi, & eloquendi vim in ipso mirabilem; vel solutæ orationes, vel poeticis astrictæ numeris; vel epistolæ, tum negotiales, tum morales; vel dialogi, vel historia, vel cætera ingenij partium genera; siue per commentationem concipienda, & informanda, siue per scriptionem edenda, & perficienda essent.



da essent. nihil dicatur de hetrusca lingua cognitione, quā ille<sup>5</sup> sibi alienā linguā, perinde ac si una cū nutricis lacte suxisset, per quā apposite, & eleganter, tum scribendo, tum loquendo suis temporibus vsurpabat. Prestantem vero illius memoriam, ad comprehendendum promptam, & alacrem, ad retinendum firmam, atque diuturnam: vim, & proprietatem in pronunciando, & agendo familiarem, oratoriam, tragicam plane mirandam: perpetuam quoque in omnibus iure imperantium, & studiorum ordinem prescribentium mandatis exequendis curam, studium, diligentiam; saepe, saepe inquam? immo vero assidue potius, ut memoria tenetis, in hoc ipso nobili eius laudum theatro, magna cum animorum voluptate cognouistis. Quid? infirmissimum ne erit illius ingenij argumentum, quod minorum, maiorumque perelegantium characterum scribendorum artificio praeclatus erat singulari? Id, ne aliena quaerantur testimonia, satis superque praedicant tabellae complures, ad hanc virtutis doctrinaeque sedem adornandam comparatae; in quibus Fabricius erudita, & pia incitamenta uirtutum, quae illius erunt etiam in posterum monumenta laudis, luculenter inprimis, & accurate descripsit. Hic autem, quamuis ad grauiora properat animus; illud praeterire tacitus nullo modo possum, ad uitae nostrae inconstantiam, & mutabilitatem nobis ob oculos collocandam vehementer accommodatum. Pridie Cal. Sextiles, (postridie enim Cal. easdem febris laborare cepit) cum in Congregationis nostrae fastis, siue annalibus, quos ille à principio totos continuate

perscripserat, postrema quadam prout mandatum fuerat  
adscriptisset: tantum albi casu reliquit in extrema tabula;  
quantum haud ita multo post, satis alteri fuit, ad extremum  
eius vitæ diem, publicis literis consignandum. ita fortasse ne-  
sciens, dum viventium sociorum descripsit actiones, mortis  
sua tempus, si ita loqui fas est, sibi bonus adolescens, nescio  
quo pacto prescripsit. ut hinc etiam facile quivis intelligat,  
*Aud. quam sint hominum spes inanes, quam infirma consi-  
lia; quam sit vel in ipso ætatis, ac iuuentutis flore, nostri exitus  
fallax, mutabilis, incerta conditio. Iam vero virtuti Fabri-  
cij Gentinij, quæ poterit paroratio reperiri? ecquid nam est,  
quod aut illo non indignum, aut vobis novum, aut alijs pluri-  
mis inauditum possimus afferre? Neque enim sunt ea solæ  
virtutes ingenui, christiani; iuuenis, quas vulgus existimat;  
splendor generis, parentum gloria, opes, diuitiæ, res à maioribus  
cum dignitate gesta; recta membrorum compositio, roburque  
corporis, acumen ingenij, solers in doctrinis comprehendendis  
industria: quæ tamen ipsæ omnes in Academico nostro, si-  
quidem eum vellemus alienis potius, quam proprijs ornamen-  
tis decorare, tales profecto inuenirentur, quales in multis eius  
æqualibus, & quidē magna laude, atque honore dignis inue-  
niri fortasse nequaquā possent. Verū sunt alia maiora, illius  
multo etiam magis propria, sed a nobis, ne breuem laudatio-  
nem, in bene longam historiam cōuertamus, vobis humanis.  
*Aud. ita ut facitis attente comitantibus, cursim, ac festinan-  
ter indicanda potius, quam lente, ocioseq; demonstranda. An  
illius**

illius forte prudentiam querimus? ea in multis, atque ut in adolescente, grauissimis officijs, honorumq; gradibus mirandum in modum emicuit; in quibus illum partim Gymnasium Eloquentiae, partim Academia nostra Parthenia; partim Beatissimae Virginis Congregatio frequenter exercuit. nam in sententijs palam, atque ex improviso dicendis, quam se se grauem, & prudentem ostenderit, vobis relinquo statuendum. Aud. prudentissimi, qui Fabricium Gentinium, dum nobiscum viueret, in ingenuis muneribus obeundis, identidem in hac ipsa pulcherrima studiorum nostrorum palaestra desudantem; aetate quidem adolescentem, ac pene puerum; at vero iudicio prudentia, consilio senem, una, & mente, voce toties appellastis. Iustitiam ne in Academico nostro inuestigamus? tamen scur ea inuestigentur, quae in promptu sunt omnibus? Neque vero, si quid in hanc sententiam dicendum esset, propterea diuidenda hic esset iustitiae virtus in eas partes, ac formas, quae ad Ciuitatum, Rerumq; pub. Iudices, Magistratus, Principes referuntur. quamquam in ijsdem ipsis excelluisse Gentinium affirmare possumus, gerendo saepius Gymnasii Rhetorici, hoc est adumbratae cuiusdam, & iuuenilis Reip. Principatu. Atque, ut cursim hanc etiam laudum illius partem perstringamus; si iustitiam definiunt sapientes, esse creditis in rebus fidem; Fabricius Gentinius, publicam Sodalitatis nostrae pecuniam, atque alia, quae ad pietatem in animis nostris excitandam pertinent, honorificis Quaestoris, Assistentisque nominibus, incorrupta fide, perpetuaeque integri-



tate tractauit. Si amicitiam in beneuolentia: Fabricius  
ita quibusdam honeste familiaris erat, ut omnes prudenter  
amaret, ab omnibus liberaliter amaretur. si in modera-  
tione animaduertendi lenitatem; Gentinius quas pœnas iure  
sibi posse videbatur acute, ac eloquenter defendendo priua-  
tus; pro potestate ignoscendo, Gymnasij Princeps libenter,  
& opportune, à suis condiscipulis auertebat. Si iustitia  
vulgo bonitas nominatur; is ~~et~~ ne cuiquam noceret attente  
prouidebat, & ad bene de omnibus merendum, quantum in se  
erat, magnam curam, atque operam conferebat. Denique si  
erga parentes pietas, & in eos quos reuereri oporteat,  
obseruantia, inter solidas iustitiæ laudes numeratur; Fabri-  
cius noster, tantum abest, ut hoc sibi ornamentum deesse sit  
passus, ut nobis potius exemplum ad intuendum, & imitan-  
dum reliquerit in hoc genere præclarissimum. Testem habemus,  
~~et~~ eum sane luculentum, Patrem illius optimum, mœ-  
rore quidem, ac dolore merito circumseptum, sed pro sua ui-  
rili constantia, & animi firmitate in tali casu, tantoque vul-  
nere nequaquam oppressum. testem habemus ut, comprehen-  
dam breui, nostri huius Gymnasij, Congregationis, & Aca-  
demia rectorem, ac moderatorem, alterum Fabricij qua-  
si parentem, acerbo animi sensu vehementer affectum:  
quos, atque alios grauioris auctoritatis viros, non de-  
bita solum, & communi reuerentia prosequabatur; sed  
ea, qua uel minimus eorum nutus illum, quamuis ingenio,  
~~et~~ prudentia præditum singulari, quoquo ipsi uellent su-  
bito



bito adduceret, idemque si opus foret, repente deduceret. Virtus uero adolescentis, ut inusitata, & rara; sic nouo, illustri-  
 que præconio celebranda. At pietas in animum suum, & ve-  
 rus erga immortalē huius uniuersitatis effectorē, et adminis-  
 tratorem cultus, ac religio, quibus potissimū præcipua, et ma-  
 xima potestas instituta continetur, quantopere in Sodali nobis  
 gratissimo floruerit? ad harū rerum memoriā uestros animos  
 reuocare ultimo loco statui, Iuuenes honestissimi; quod præsta-  
 re mox quā celerrime enitar, si eius fortitudinē, actēperantiā,  
 prius extremis quasi digitis cursim attigero. Atque hic res  
 in armis fortiter, et præclare gestas, ab eius ætate, ac studio ab-  
 horrentes, nullus profecto uestrū expectat. quod si quis ma-  
 gnū uel illius animū intueri, in impedimentis, quæ in cursu  
 uirtutū persæpe obijciuntur, egregie superādis; æquabilitatem  
 in varijs humana vitæ calamitatibus tolerandis, cōstātiā in  
 susceptis pro uirtute, & honestate laboribus, quandiu uel oportuit,  
 uel potuit perferendis: nā ille intelliget, ea in Fabricio nos-  
 tro, nō minus clara, & spectata fuisse quā cetera. Equidem  
 dum reputo apud eos me dicere, qui multo fortasse melius  
 quam egomet, Academici nostri nobis à morte nuper ablati  
 uirtutes, laudesq; cognoscant; ingēti me longioris orationis o-  
 nere sentio liberari. quo etiam fit, ut de memorabili eius tem-  
 perantia, & castimonia, quā sex annos, & eo amplius (tādiu  
 enim in horū religiosissimorū Patrum disciplina fuit) immo  
 uero etiam, à primo tempore ineuntis ætatis honorifice, re-  
 ligioseq; seruauit, dicendum non esse videatur. Id nisi alia,

eaque

eaque multiplici ratione constaret; vel ex eo quod mihi postremum in hac dictione mea proposueram, comprehendi. liquido posset. nam tot annorum in æterna sua, & aliorum salute inquirenda, Deo opt. max. colendo; augustissima Virgine Dei matre veneranda, & multis quæ ad hæc summa reuocantur, christianæ pietatis officijs rite præstandis, quam in Fabricio Gentinio conspeximus, perpetua, mirabilisque perseverantia, quantum ad morum integritatem, animique candorem valeant, non est, mea quidem sententia difficile iudicare. Quis igitur, (quando in portum orationis prouehor, unde discesseram) quis vestrum ignorat, Illustres Pathenij, in Congregationis nostræ cœtibus frequentandis, in sacris concionibus audiendis, in sacrosanctis Omologesis, & Eucharistiæ mysterijs obeundis, in pueris, ac rudibus doctrina Christiana imbuendis, quam assiduus, quam constans, quam inflammatus fuerit Fabricius Gentinius: qui harum rerum non modo tempora, menses, hebdomadas; verum ipsos etiam dies, ipsas horas, ac pene momenta temporis præstituta, semper, modo per graua liceret impedimenta, prudens ac volens obierit. quæ quidem, nisi tam magna esse fateamur, ut cum verissima sint, prope tamen incredibilia in tali ætate videri possint; ecquæ nam tandem, magna esse fatebimur? Adolescentem natura sua letum, & hilarem, præstantem ingenio, in ingenuarum disciplinarum studijs nunquam non occupatum; præter communem adolescentiæ consuetudinem, tanquam senem aliquem, aut affecta, vel confirmata ætate virum, in optimis,  
Et ad

& ad immortalem beatitatem intentis actionibus, tandiu,  
 tam libenti, gaudentique animo, tam constanter & integre  
 versatum esse? Verba mihi desunt Aud. cum ea quæ me-  
 cum ipse cogitans de miranda Sodalitatis, & Academici huius  
 nostri virtute sentio, explicare, ut à vobis omnibus qui nos-  
 trum luctum tanta vestra gravitate cohonestatis intelligen-  
 tur, vel ut in eorum cognitionem facile veniatis, indicare cer-  
 te contendo. O felicem teneræ, atque flexibilis ætatis nostræ  
 conditionem; si tamen ad artes homine ingenuo, & humano  
 dignas, ad veram laudem, ad solidam gloriam, ad stabiles ho-  
 nores, ad sempiternam salutem, ijs tum incitamentis, tum ad-  
 iumentis prudenter utaris, ac fortiter; quæ abunde tibi diui-  
 na illa bonitas, hac nostra in primis tempestate suppeditat. ò  
 felices parentes, & iuventutis, ac pueritiæ curatores; qui ad  
 pretiosissima Dei Opt. Max. vestræ fidei commissa deposi-  
 ta, liberos inquam vestros saluos, tectos, integros, inuiolatos  
 cœlesti mortalium, & immortalium Patri custodiendos; tot  
 commoda, tantamque oportunitatem, si quidem illam velitis  
 agnoscere, in vestris regionibus, in urbe vestra, intra domes-  
 ticos, ut ita dicam, parietes, habetis. Cognovisti, & egregie  
 cognovisti, cœleste depositum simul, ac donum, te appello Paule  
 Gëtini, Sodalitatis nostri amantissimi parës optime: qui non modo  
 Fabricium tibi à præpotenti Deo concessum, cum primum  
 per eius ætatem, & ingenium licuit, incorruptæ disciplinæ, ac  
 tutissimæ custodiæ tradidisti: verum plurima etiam iuventu-  
 tis pericula sapienter animo colligens, licet illum ad graviora  
 studia



studia satis idoneum, tibi eius Doctor, superiore anno reddidisset; tamen quam diutissime fieri potuit, in eadem liberali, & accurata custodia conservare voluisti. Abstulit modo carissimum tibi pignus, is qui antea commendauerat, Deus Opt. & immortalis: ac licet, & quia tuum, & quia tua virtute, integritate, religione dignum filium, tibi necopinanti nuper ablatum, iure paterna mœstitia, dolore, lachrymisq; prosequeris; est nihilominus tamen, est quod te, & debitum fideliter asseruatum, restitutumq; feliciter; & præsentia illius pericula euitata; & incerti, nec raro periculosi rerum futurarum euentus, & laudabilis eius vitæ ratio, salutarisque terminus consolentur. Præmisisti ad felicitatem filium parens, nō amisisti: eripuit (si ita loqui fas est) eum tibi diuina bonitas, ne perniciosorum hominum, demonumque malitia, diutius uiuentem eriperet. Vos autem, Parthenij ornatissimi, quorum pius animi dolor per vultum, ac per oculos, qui fideles animorum sunt indices, ueluti per christallina quædam integumenta penitus introspicitur: gaudeatis in dolore, & vehementer gaudeatis licet. nam si inopinatus iucundissimi socij, ac pene ducis studiorum nostrorum è vita discessus, ita vestrum effodit pectus, ut carissimarum nobis rerum amissarum memoria solet effodere: tamen si vitæ illius ad morales, christianæq; virtutis normam traductæ, si mortis quæ vitæ ipsi per similis fuit, uobis in mentem veniat: conuertatur in letitiam dolor, vel certe magna ex parte leniatur necesse est: ne, aut parum in sanctissima CHRISTI Redemptoris fide constan-

tes,



tes, aut in Academicum, ad felicissima laborum suorum  
 capienda præmia, ex hoc terreno exilio, cælestem in pa-  
 triam euocatum inuidi esse videamini. Nam, ut in eius  
 felici ad æternam quietem profectiōe, oratio nostra tam-  
 quam in portu conquiescat; cum illo quis neget actum es-  
 se præclare? quis iure arbitretur, aditum in cælum ex-  
 peditum, honestissimo adolescenti nequaquam patuisse?  
 præter enim ea per perpetua salutis argumenta, quæ in Fa-  
 bricio nostro uiuo, atque incolumi diximus, immo uero  
 etiam uidimus floruisse: eius morbus, & obitus, nonne  
 satis firmam, & claram nobis fidem faciunt? IV. Non.  
 Aug. in intemperato huius anni temperamento, cum  
 vehementi febre correptus decumbere cœpisset; tametsi  
 humanæ medicinae remedia, quippe à summo rerum effec-  
 tore, ad salutem nostrorum corporum instituta, nun-  
 quam pro sua prudentia, pietateque respuebat; patrem  
 qui sibi confitenti aures dare consueuerat, nulla expecta-  
 ta medicorum, aut parentum admonitione, ad se celeri-  
 ter aduocari iubet; delicta per sacram confessionem abs-  
 tergit. inde cum pestifer morbus, intestini continuatione in-  
 cendij, corporis robur, ac vires absumeret; eo fortior  
 fiebat animus, quo corpus imbecillius reddebatur. Itaque  
 mira patientiæ documenta dedit, mira suæ voluntatis cum  
 diuina coniunctæ, mira studij erga beatissimam virginum  
 Principem singularis. At uero quo die illustrissimi sanc-  
 tissimiq; martyris Laurentij memoriã, christianus popu-  
 lus

lus anniuersaria cæremonia consecrauit ; quasi iam iam  
exitus sui tempus instare, inusitato quodã cælestique iudi-  
cio prasagiret , Sacerdote iterum festinanter accersito,  
per sanctum pœnitentia sacramentum , totiùs antè-  
acta uita maculas , quasçunque post attentam commen-  
tationem recordari potuit , magno cum sensu doloris  
expiavit : deinde uiuo , & immortalì pane , sacraque  
Ecclesia orthodoxa unctione uehementius corroboratus,  
indicatum sibi ; atque adeo indictum à religiosis ho-  
minibus uicinè mortis certamen , admirabili tranquil-  
litate mentis , & corporis , ad ultimum uitæ punc-  
tum strenue , fortiterque sustinuit . Denique pri-  
die Id. Augusti, in sua cordis , orationis, uultus aqua-  
bilitate , & constantia perseuerans ; I E S V M nos-  
træ salutis autorem , & conseruatorem è cruce pen-  
dentem auide contemplans , & inuocans , prima noc-  
tis uigilia ; per angustis terrenæ , atque arida custo-  
diæ cancellis diuina misericordia patefactis ; ad am-  
plissimos , aeternoque uere florentissimos cælestis bea-  
titudinis hortos , atque ad DEVM fontem uiuum, in-  
explicabili , & perenni dulcedine affluentem ; qui-  
busdã beatæ immortalitatis, & extremi Congregationis  
nostræ beneficij pennis instructus, immortalis ille animus,  
feliciter, quemadmodũ quidẽ cõfidimus aduolauit. O adole-  
scentem uere gloria dignum, in quo humana diuinaque  
ornamēta, se se ostenderunt mirabiliter, & supra quàm à  
me dici

me dici possit expressa; in quo communes permultorum  
 causa, longemeliore quā in alijs plerisque, ac præstatiores  
 effectus peperere. Quid enim tam est commune, quam  
 rerum plurimarum ignoratio, animique leuitas pue-  
 ris, atque adolescentibus; superbia ingeniosis, & e-  
 ruditione præstantibus; multa vitiorum genera iuue-  
 nibus; æternæ salutis obliuio, in assidua caducarum  
 rerum cognitione versantibus? Fabricius Gentinius ita  
 puer, & adolescens fuit, ut tum scientia, tum  
 grauitate sane multis æqualibus, haudquaquam obscuræ  
 præstiterit: ita ingenio doctrinaq; valuit, ut cū esset multis  
 in hoc genere superior ijs tamen ipsis hac eadem in re, adhi-  
 bit a in consiliū ratione cōcederet: ita iuuenis, ut nō modo vi-  
 tiorum esset hostis acerrimus, sed compluribus etiam, ijs-  
 que singularibus virtutum generibus nobilissimus: ita de-  
 nique in politioribus litteris, et ingenuis artibus addiscēdis  
 implicatus, ut de sēpiterne salutis amore ac studio, quoad  
 eius fieri posset, nihil unquam remitteret. O Gentini So-  
 dalis noster amantissime, atq; optime; quam iure te felicem,  
 quā vere te beatum uocare possumus: qui in huius fluxæ ui-  
 tæ, maximeq; iuuenilis ætatis alto, tam multis rerū aduer-  
 sarum scopulis, tot secundarū sirenibus, perturbationū uen-  
 tis, peruersorū demonū procellis, hominū conscleratorum  
 uoraginibus, & scelerum naufragijs exposito: sacrosancta  
 VIRG. MATRE, tam periculosi maris fidelissima cynosu-  
 ra, à qua nunquā oculos auertisti, duce per petua: omnibus



non modo malis, sed malorum periculis, & periculorum  
formidine liberatus, in tutissimum, omniq; bonorum copia  
circumfluentem, infinita salutis, quietis, & gloria portū in-  
troisti. Sed me ad orationis exitum festinantem, Parthenij,  
detinent mirandum in modum, & afficiunt, hæ voces Fa-  
bricij nostri, quas audire mihi uideor in hoc ipso loco quo-  
tidie, atque hoc maxime tempore quo eius funeri iusta  
persoluimus. Valete, inquit, valete Sodales, & Acade-  
mici mei; stet vestrum Sodalitium, stet Academia uestra  
præclara, & florens, quæ mihi fuere perfugium gratissi-  
mum. Ego ex isto corporis miserrimo carcere, diuinæ vo-  
luntatis nutu expeditus, ca libertate, ac felicitate fruor,  
quam nulla unquam temporis circumscriptio metietur. ô  
fructuose suscepti labores mei, ô salubres cogitationes;  
ô exercitationes optimæ; nunc uero quam periculosa sit uest-  
ra ista vita plane intelligo, nunc uero quam suauis, &  
iucundi sint virtutum, & recte factorum fructus plane  
sentio: nunc demum pietatis radices quæ istic inter uos  
humiles, amaraque uidebantur, in immortalis cœlestium  
concilio, æterna compensata gloria, & dulcedine mitigan-  
tur. Vos me ut dicitis amisso, re autem uera præmisso  
doletis extinctum, lugubribus meum obitum laudationi-  
bus prosequimini; grata est uestra mihi beneuolentia, gra-  
tum studium, grata pietas. sed gaudeatis licet: ego enim  
tutum, ac tranquillum, quietis in omnem æternitatem du-  
raturæ portum teneo. Vos mortalium rerum caducam flu-  
xamque



xamque naturam, quæque ~~et~~ quàmvis tempestatibus, ac  
 procellis exposita sit considerate: summum uitæ vestræ tēpus  
 perpetuo ante oculos habetote: vis enim vere alacri animo  
 mortem excipit vel subito vententem; qui diu se ad illius  
 aduentum composuit. ergo mecum præclare agitur; vos  
 in suscepta salutaris sententia persistite; nulla re, ut à diui-  
 na lege declinetis adducamini. nullus tantus labor susci-  
 pitur, & perfertur in terris, quin infinitis partibus, cœ-  
 lesti quiete superetur. Hæc tu nobiscum felicissime Gen-  
 tini: hæc vicissim nos tecum. (respondebo enim omnium  
 nomine, quando à me uno de te, omnes apud se verba fieri  
 voluerunt). quod nos reliquisti, et repente reliquisti, non  
 possumus non moueri; sic enim vis quædam humana pos-  
 tulat: sed & ratione in consilium adhibita, & oratione  
 tua perincunda recreati, querelis, ~~et~~ lamentationibus  
 æquo animo super sedemus, ac tibi viuum istud tam excel-  
 lens bonum gratulamur. Tam te, ut nos socij tui, quos in hoc  
 periculorum plenissimo pelago reliquisti, quo in eundem  
 tranquillissimæ vitæ portum, salus animi, corporisque  
 mercibus inuehamur, cœlesti charitate iam inflammatis  
 precibus, communi atque una omnes, & mente, & voce  
 obsecramus, efficias. Reliquum illud est, Parthenij hones-  
 tissimi, ut si Fabricium Gentinium Sodalem, atque  
 Academicum nostrum, ingenio, doctrina, pietate, virtute  
 præstantem; debitis lachrymis, & laudis insignibus, ac  
 monimentis, quando viuum diutius non licuit, mortuum  
 honeste

honestauimus; eiusdem queso christianis adolescentibus  
dignas actiones, illius maxime verbis inflammati,  
moribus nostris exprimere studeamus: quo fiat  
ut sobrie, iuste, & pie viuamus hoc per  
breue seculum: & mortalis huius  
vite finis, sit nobis cum Fa-  
bricio nostro, immortalis  
illius, ac beatissime  
principium.

*Dixi.*

**F I N I S.**



## DE VETERI AC NOVO ACADEMIAE

FERRARIEN. PARTHENIAE PRINCIPE :

*Herculis Romæ C. Academici**Parthenij cognomento**Philareti,*

Ad cæteros Academicos Epigramma.

*Dicite Parthenij, cælo gratissima pubes;**Dux vetus in nobis emicat, an ne novus?**Dux erat Alphonsus radiantis candor honoris;**Insignis Phæbo, Mercurioque potens.**Dux est Alphonsus generoso stemmate fulgens;**Eloquio Alphonsus nobilis, atque lyra.**Fabricij tulit ille alacer super æthera laudes:**Hic quoque Fabricium personat ore lubens.**At Aquila assuerat nostras volitare per auras;**Nunc geminus currit nostra per arua Leo:**Sed caput excelsum diademate iactat utrunque,**Illa furens pennis, viribus iste ferox.**Quid tandem? nostro radiat novus æthere Princeps,**Quem decorant veteris candida signa Ducis.*

